

四庫全書

史部

欽定四庫全書

欽定續通志卷三百七十二

列傳

宋 七十六

劉錡

吳玠

吳玠 提

李顯忠

楊存中

郭浩

楊政

劉錡字信叔秦州成紀人瀘州軍節度使仲武第九子

也美儀狀善射聲如洪鐘嘗從仲武征討宣和間投閣  
門祇候高宗即位錄仲武後錡得召見特授閣門宣贊  
舍人差知岷州為隴右都護與夏人戰屢勝夏人兒啼  
輒怖之曰劉都護來張浚宣撫陝西以為涇原經畧使  
兼知渭州浚合五路師潰於富平慕洵以慶陽叛攻環  
州浚命錡救之留別將守渭自將救環未幾金攻渭錡  
留李彥琪捍洵親率精銳還救渭已無及進退不可乃  
走德順軍彥琪遁歸渭降金錡貶秩知歸州兼沿邊安

撫紹興三年復官為宣撫使統制金人攻援和尚原乃  
分守陝蜀之地名還除江東路副總管六年權提舉宿  
衛親軍帝駐平江解潛王彥兩軍交鬪俱罷命錡兼將  
之錡因請以前護副軍及馬軍通為前後左右中軍與  
遊奕凡六軍每軍千人為十二將前護副軍即彥八字  
軍也於是錡始能成軍扈從赴金陵七年帥合肥八年  
戍京口九年摧果州團練使龍神衛四廂都指揮使主  
管侍衛馬軍司十年金人歸三京充東京副留守節制

軍馬所部八字軍纔三萬七千人將發益殿司三千人皆攜其孥將駐于汴家留順昌錡自臨安浙江絕淮凡二千二百里至渦口方食暴風拔坐帳錡曰此賊兆也主暴兵即下令兼程而進未至順昌三百里金人果敗盟來侵錡與將佐舍舟陸行先趨城中庚寅諜報金人入東京知府事陳規見錡問計錡曰城中有糧則能與君共守規曰有米數萬斛錡曰可矣時所部選鋒遊奕兩軍及老稚輜重相去尚遠遣騎趨之四鼓乃至及旦

得報金騎已入陣錡與規議斂兵入城為守禦計人心  
乃安召諸將計事皆曰金兵不可敵也請以精銳為殿  
步騎遮老小順流還江南錡曰吾本赴官留司今東京  
雖失幸全軍至此有地可守奈何棄之吾意已決敢言  
去者斬惟部將許清號夜叉者奮曰太尉奉命副守汴  
京軍士扶攜老幼而來今避而走易耳然欲棄父母妻  
子則不忍欲與偕行則敵翼而攻何所逃之不如相與  
努力一戰於死中求生也議與錡大喜鑿舟沉之

示無去意寘家寺中積薪於門戒守者曰脫有不利即  
焚吾家毋辱敵手也分命諸將守諸門明斥堠募土人  
為間探於是軍士皆奮男子備戰守婦人礪刀劒爭呼  
躍曰平時人欺我八字軍今日當為國家破賊立功時  
守備一無可恃錡於城上躬自督勵取偽齊所造癡車  
以輪轆埋城上又撤民戶扉周匝蔽之城外有民居數  
千家悉焚之凡六日粗畢而游騎已涉潁河至城下壬  
寅金人圍順昌錡豫於城下設伏擒千戶阿哈等二人

詰之云韓將軍營白沙渦距城三十里錡夜遣千餘人  
擊之連戰殺獲頗衆既而三路都統葛王褒以兵三萬  
與龍虎大王合兵薄城錡令開諸門金人疑不敢近初  
錡傳城築羊馬垣穴垣為門至是與清等蔽垣為陣金  
人縱矢皆自垣端軼著於城或止中垣上錡用破敵弓  
翼以神臂强弩自城上或垣門射敵無不中敵稍却復  
以步兵邀擊溺河死者不可勝計破其鐵騎數千特授  
鼎州觀察使樞密副都承旨沿淮制置使時順昌受圍



已四日金兵益盛乃移砦於城東李村距城二十里錡  
遣曉將閻充募壯士五百人夜斫其營是夕天欲雨電  
光四起見敵輒殲之金兵退十五里錡復募百人以往  
或請斲枚錡笑曰無以枚也命折竹為詔如市井兒以  
為戲者人持一以為號直犯金營電所燭則皆奮擊電  
止則匿不動敵衆大亂百人者闕吹聲即聚金人益不  
能測終夜自戰積屍盈野退軍老婆灣烏珠在汴聞之  
即索靴上馬過淮寧留一宿治戰具備糗糧不七日至

順昌錡聞烏珠至會諸將於城上問策或謂今已屢捷  
宜乘此勢具舟全軍而歸錡曰朝廷養兵十五年正為  
緩急之用況已挫賊鋒軍聲稍振雖衆寡不侔然有進  
無退且敵營甚邇而烏珠又來吾軍已動彼躡其後則  
前功俱廢使敵侵軼兩淮震驚江浙則平生報國之志  
反成誤國之罪衆皆感動思奮曰惟太尉命錡募得曹  
成等二人諭之曰遣汝作間事捷重賞第如我言敵必  
不汝殺今置汝綽路騎中汝遇敵則佯作墜馬為敵所

得敵帥問我何如人則曰太平邊帥子喜聲侵朝廷以兩國講好使守東京圖逸樂耳已而二人果遇敵被執烏珠問之對如前烏珠喜曰此城易破耳即置鵝車砲具不用翌日錡登城望見二人遠來縋而上之乃敵械成等歸以文書一卷繫於械錡懼貳軍心立焚之烏珠至城下責諸將喪師衆皆曰南朝用兵非昔之比元帥臨城自見錡遣耿訓以書約戰烏珠怒曰劉錡何敢與我戰以吾力破爾城直用靴尖趯倒耳訓曰太尉非但

請與太子戰且謂太子必不敢濟河願獻浮橋五所濟而大戰烏珠曰諾乃下令明日府治會食遲明錡果為五浮橋於潁河上敵由之以濟錡遣人毒潁上流及草中戒軍士雖渴死毋得飲于河者敵用長勝軍嚴陣以待諸帥各居一部衆請先擊韓將軍錡曰擊韓雖退烏珠兵尚不可當法當先擊烏珠烏珠一動則餘無能為矣時天大暑敵遠來疲敵錡士氣閒暇敵晝夜不解甲錡軍皆番休更食羊馬垣下敵人馬饑渴食水草者輒

病徃徃困乏方晨氣清涼錡按兵不動逮未申間敵力  
疲氣索忽遣數百人出西門接戰俄以數千人出南門  
戒令勿喊但以銳斧犯之統制官趙搏韓直身中數矢  
戰不肯已士殊死闖入其陣刀斧亂下敵大敗是夕大  
雨平地水深尺餘乙卯烏珠拔營北去錡遣兵追之死  
者萬數方大戰時烏珠被白袍乘甲馬以牙兵三千督  
戰兵皆重鎧甲號鐵浮圖戴鐵兜牟周匝綴長簷三人  
為伍貫以葦索每進一步即以拒馬擁之人進一步拒

馬亦進退不可却官軍以槍標去其兜牟大斧斷其臂  
碎其首敵又以鐵錡分左右翼號拐子馬號長勝軍專  
以攻堅戰酣然後用之自用兵以來所向無前至是亦  
為錡軍所殺戰自辰至申敵敗遽以拒馬本障之少休  
城上鼓聲不絕乃出飯羹坐餉戰士如平時敵披靡不  
敢近食已撤拒馬木深入斫敵又大破之棄屍斃馬血  
肉枕藉軍器旗甲積如山阜初有河北軍告官軍曰我  
輩原是左護軍本無鬪志所可殺者兩翼拐子馬爾故

錡兵力擊之烏珠平日恃以為強者什損七八至陳州數諸將之罪韓常以下皆鞭之乃自擁衆還汴捷聞帝喜甚授錡武泰軍節度使侍衛馬軍都虞侯知順昌府沿淮制置使是役也錡兵不盈二萬出戰僅五千人金兵數十萬營西北亘十五里每暮鼓聲震山谷然營中譙譁終夜有聲金遣人近城竊聽城中肅然無雞犬聲烏珠帳前甲兵環列持燭照夜其衆分番假寐馬上錡以逸待勞以故輒勝時洪皓在燕密奏順昌之捷金人

震恐燕之重寶珍器悉徙而北意欲損燕以南棄之故  
議者謂是時諸將協心分路追討則烏珠可擒汴京可  
復而王師亟還自失機會良可惜也七月命為淮北宣  
撫判官副楊沂中破敵兵於太康縣未幾秦檜請令沂  
中還師鎮江錡還太平州岳飛以兵赴行在出師之謀  
寢矣十一年烏珠復發兩河兵謀再舉詔大合兵于淮  
西以待之金人攻廬和二州錡自太平渡江抵廬州與  
張俊楊沂中會而敵已大入錡據東關之險以遏其衝



引兵出清溪兩戰皆勝行至柘臯與金人夾石梁河而陣河通巢湖廣二丈錡命曳薪壘橋須臾而成遣甲士數隊踰橋卧槍而坐會沂中王德田師中張子蓋之軍俱至翌日烏珠以鐵錡十萬分為兩隅夾道而陣德薄其右隅引弓射一人斃之因大呼馳擊諸軍鼓譟金人以拐子馬兩翼而進德率衆鏖戰沂中以萬兵各持長斧奮擊之敵大敗錡與德等追之又敗於東山敵望見曰此順昌旗幟也即退走錡駐和州得旨乃引兵渡江

歸太平州時並命三帥不相節制諸軍進退多出於張俊而騎以順昌之捷驟貴諸將多嫉之俊與沂中為腹心而與錡有隙故柘臯之賞錡軍獨不與奉詔班師而濠州告急俊與沂中錡趨黃連埠援之距濠六十里而南城已陷沂中欲進戰錡謂俊曰本救濠今濠已失不如退師據險徐為後圖諸將曰善三帥鼎足而營或言敵兵已去錡又謂曰敵得城而遽退必有謀也宜嚴備之俊不從命沂中與德將神勇步騎六萬人直趨濠州

果遇伏敗還遲明錡軍至藕塘則沂中軍已入滁州俊軍已入宣化錡軍方食俊遽至曰敵兵已近奈何錡曰楊宣撫兵安在俊曰已失利還矣錡語俊無恐錡請以步卒御敵宣撫試觀之錡麾下皆曰兩大帥軍已渡我軍何苦獨戰錡曰順昌孤城旁無赤子之助吾提兵不滿二萬猶足取勝況今得地利又有銳兵邪遂設三覆以待之俄而俊至曰謀者妄也乃戚方殿後之軍爾錡與俊益不相下一夕俊軍士縱火劫錡軍錡擒十六人

梟首輿上餘皆逸錡見俊俊怒謂錡曰我為宣撫爾乃判官何得斬吾軍錡曰不知宣撫軍但斬刼砦賊爾俊曰有卒歸言未嘗刼砦呼一人出對錡正色曰錡為國家將帥有罪宣撫嘗言于朝豈得與卒伍對事長揖上馬去已皆班師俊沂中還朝每言岳飛不赴援而錡戰不力秦檜主其說遂罷宣撫判官命知荆南府岳飛奏留錡掌兵不許詔以武泰之節度提舉江州太平觀錡鎮荆南凡六年軍民安之魏良臣言錡名將不當久閒乃

命知潭州加太尉復帥荆南府江陵縣東有黃潭建炎間有司決水入江以禦盜由是夏秋漲溢荆衡間皆被水患錡始命塞之斥膏腴田數千畝流民自占者幾千戶詔錡遇大禮許奏文資仍以其侄記為江東路兵馬副都監三十一年金海陵調兵六十萬自江南來彌望數十里不斷如銀壁中外大震時宿將無在者乃命錡為江淮浙西制置使節制逐路軍馬八月錡引兵屯楊州建大將旗鼓軍容甚肅觀者嘆息以兵駐清江口金

人以糧裹船載糧而來錡使善沒者鑿沉其舟錡自楚  
州退軍召伯鎮金人攻真州錡引兵還揚州帥劉澤以  
城不可守請退軍瓜州金萬戶高景山攻揚州錡遣員  
琦拒于阜角林陷圍力戰林中伏發大敗之斬景山俘  
數百人捷奏賜金五百兩銀七萬兩以犒師先是金人  
議留精兵在淮東以禦錡而以重兵入淮西大將王權  
不從錡節制不戰而潰自清河口退師揚州以舟渡真  
揚之民與江之南留兵屯瓜州錡病求解兵柄留其侄

汜以千五百人塞瓜州渡又令李橫以八千人固守詔  
錡專防江錡遂還鎮江十一月金人攻瓜州汜以克敵  
弓射却之時知樞密院事葉義問督師江淮至鎮江見  
錡病劇以李橫權錡軍義問督鎮江兵渡江衆皆以為  
不可義問強之汜固請出戰錡不從汜拜家廟而行金  
人以重兵逼瓜州分兵東出江皋逆趨瓜州汜先退橫  
以孤軍不能當亦却失其都統制印左軍統制魏友後  
軍統制王方死之橫汜僅以身免錡憤懣病益甚都督

府參贊軍事虞允文自采石來督舟師與金人戰允文  
過鎮江謁錡問疾錡執允文手曰疾何必問朝廷養兵  
三十年一技不施而大功乃出一儒生我輩愧死矣召  
詣闕提舉萬壽觀錡假都亭驛居之金人聘使將至留  
守湯思退除館以待遣黃衣諭錡徙居別試院錡發怒  
嘔血數升而卒贈開府儀同三司諡武穆錡慷慨深毅  
有儒將風金陵之南也下令有敢言錡名姓者罪不  
赦枚舉南朝諸將問其下孰敢當者皆隨姓名以答至



錡莫有應者海陵曰吾自當之然錡卒以病不能成功

吳玠字晉卿德順軍隴千人父葬永洛城因徙焉

按王綸撰

玠神道碑載曾祖謹太子太保祖遂太子太傅父康少保累世顯烈明庭傑功績記云三世皆以義烈聞

沉毅有志節知兵善騎射讀書能通大義未冠以良家

子隸涇原軍政和中夏人犯邊以功補進義副尉稍擢

隊將從討方臘破之及擊河北羣盜累功權涇原第十

將

按功績記作權涇原第十一正將

靖康初夏攻懷德軍玠以百餘騎

追擊斬首百四十級擢第二副將

按功績記作權木路第十二副將

建

炎二年春金人渡河出大慶關畧秦雍謀趨涇原都統  
制曲端守麻務鎮命玠為前鋒進據青溪嶺逆擊大破  
之追奔三十里金人始有憚意權涇原路兵馬都監兼  
知懷德軍金人攻延安府曲端進兵欲攻其必救遂攻  
蒲城命玠攻華州拔之冬劇賊史斌寇漢中不克引兵  
欲取長安曲端命玠擊斬之遷忠州刺史三年宣撫處  
置使張浚巡關陝叅議軍事劉子羽誦玠兄弟才勇浚  
與玠語大悅即授統制弟璘掌帳前親兵四年春升涇

原路馬步軍副總管

按神道碑及功績記俱作熙河路馬步軍副總管宋名臣言行別錄

作熙河路副總管

金羅索與薩里罕長驅入關端遣玠拒于彭

原店而擁兵邠州為援金兵來攻玠擊敗之金人整軍

復戰玠軍敗績端退屯涇原劾玠違節度降武顯大夫

罷總管復知懷德軍張浚惜玠才尋以為秦鳳副總管

兼知鳳翔府時兵火之餘玠勞來安集民賴以生轉忠

州防禦使九月浚合五路兵欲與金人決戰玠言宜各

守要害須其弊而乘之

按張浚本末畧浚謀大舉召端問之復謀之玠玠以宜守要害

以待其弊然後可以徐圖浚曰吾寧不知此顧今東南之事方急不得不為是耳此數語乃浚謀牽制金人木意浚與玠傳俱不載附識及次富平都統制又會諸將議戰玠曰兵

以利動今地勢不利未見其可宜擇高阜據之使不可勝諸將皆曰我衆彼寡又前阻葦澤敵有騎不得施何用他徙已而敵驟至與柴囊土藉淖平行進薄玠營軍遂大潰五路皆陷已蜀大震玠收散卒保散關東和尚原積粟繕兵列柵為死守計或謂玠宜退守漢中扼蜀口以安人心玠曰我保此敵決不敢越我而進堅壁臨

之彼懼吾躡其後是所以保蜀也玠在原上鳳翔民感其遺惠相與夜輸芻粟助之玠償以銀帛民益喜輸者益多金人怒伏兵渭河邀殺之且令保伍連坐民冒禁如故數年然後止紹興元年金將摩哩自鳳翔別將敖拉扎哈自階成出散關約日會和尚原敖拉扎哈先期至陣北山索戰玠命諸將堅陣待之更戰迭休山谷路狹多石馬不能行金人舍馬步戰大敗移砦黃牛會大風雨雹遂遁去摩哩方攻箭筈關玠復遣將擊退之兩

軍終不得合始金人之入也玠與璘以散卒數千駐原上朝間隔絕人無固志有謀劫玠兄弟北去者玠知之召諸將歃血盟勉以忠義將士皆感泣願為用張浚錄其功承制拜明州觀察使居母喪起復兼陝西諸路都統制金人自起海角恒常勝及與玠戰輒北憤甚謀必取玠羅索死烏珠會諸道兵十餘萬造浮梁跨渭自寶雞結連珠營壘石為城進攻和尚原玠命諸將選勁弓強弩分番迭射號駐隊矢連發不絕繁如雨注敵稍却

則以奇兵旁擊絕其糧道度其困且走設伏于神全以待金兵至伏發衆大亂縱兵夜擊大敗之烏珠中流矢僅以身免張浚承制以玠為鎮西軍節度使璘為涇原路馬步軍副總管烏珠既敗遂自河東歸燕山復以薩哩罕為陝西經畧使屯鳳翔與玠相持二年命玠兼宣撫處置使司都統制節制興文龍三州金久窺蜀以璘駐兵和尚原扼其衝不得逞將出奇取之時玠在河池金人用叛將李彥琪駐秦州睨仙人關以綴玠役令游

騎出熙河以綴關師古薩里罕自商於直擣上洋

按功績記

及張發功績記叙引建炎以來朝野雜記俱作梁洋張拭撰其父浚墓志作上津

三年正月取金

州二月長驅趨洋漢興元守臣劉子羽急命田晟守饒  
風關以驛書招玠入援玠自河池日夜馳三百里以黃  
相遺敵曰大軍遠來聊用止渴薩里罕大驚以杖擊地  
曰爾來何速耶遂大戰饒州崩金人被重鎧登山仰攻  
一人先登則二人擁後先者既死後者代攻玠軍弓弩  
亂發大石推壓如是者六晝夜死者山積而敵不退募



敵死士得五千將夾攻會玠小校有得罪奔金者導以  
祖溪間路出關背乘高以關饒風諸軍不支遂潰玠退  
保西縣敵入興元劉子羽退保三泉築潭毒山以自固  
玠走三泉會之未幾金人北歸玠急遣兵邀于武休關  
掩擊其後軍墮澗死者以千計盡棄輜重去金人始謀  
本謂玠在西邊故道險東來不虞玠馳至雖入三郡而  
得不償失進玠檢校少保充利州路階成鳳州制置使  
四年二月敵復大入攻僊人關先是璘在和尚原餉饋

不繼玠又謂其地去蜀遠命璘棄之經營僊人關右殺金平初築一壘移原兵守之至是烏珠薩里罕及劉夔率十萬騎入侵自鐵山鑿崖開道循嶺東下玠以萬人當其衝璘率輕兵由七方關倍道而至與金兵轉戰七晝夜始得與玠合敵首攻玠營玠擊走之又以雲梯攻壘壁楊政以撞竿碎其梯以長矛刺之璘拔刀畫地謂諸將曰死則死此退者斬金分軍為二烏珠陣于東韓常陣于西璘率銳卒介其間左縈右繞隨機而發戰久

璘軍少憊急屯第二隘金生兵踵至人被重鎗鐵勾相連魚貫而上璘以駐隊矢迭射矢下如雨死者層積敵踐而登薩里罕駐馬四視曰吾得之矣翌日命攻西北樓姚仲登樓酣戰樓傾以帛為繩挽之復正金人用火攻樓以酒缶撲滅之玠急遣統領田晟以長刀大斧左右擊明炬四山震鼓動地明日大出兵統領王喜王武率銳士分紫白旗入金營金陣亂奮擊射韓常中左目金人始宵遁玠遣統制官張彥勅橫山砦王俊伏河池

扼歸路又敗之以郭震戰不力斬之是役也金本謂蜀  
可圖既不得逞度玠終不可犯則還據鳳翔授甲士田  
為久留計自是不妄動捷聞授玠川陝宣撫副使復鳳  
秦隴三州拜檢校少師奉寧保定軍節度使六年兼營  
田大使易保平靜難節七年遣裨將馬希仲攻熙州敗  
績又失鞏州玠斬之玠與敵對壘且十年常苦遠餉勞  
民屢汰冗員節浮費益治屯田歲收至十萬斛又調戍  
兵命梁洋守將治褒城廢堰民知灌溉可恃願歸業者

數萬家九年金人請和帝以玠功高授特進開府儀同  
三司遷四川宣撫使陝西階成等州皆聽節制遣內侍  
奉親札以賜至則玠病已甚扶掖聽命帝聞而憂之命  
守臣就蜀求善醫且飭國工馳視未至玠卒于僊人關  
年四十七贈少師諡武安玠善讀史凡往事可師者錄  
寘座右用兵本孫吳務遠畧不求小近利故能保必勝  
御下嚴而有恩卒伍至下者得以情達故士樂為之死  
選用將佐視勞能為高下先後不以親故權貴撓之玠

死胡世將問玠所以制勝者璘曰璘從先兄有事西夏  
每戰不過一進卻之頃勝負輒分至金人則更進迭退  
忍耐堅久與之角逐滋久乃得其情選據形便出銳卒  
更迭遠之與之為無窮使不得休暇以沮其堅忍之勢  
至決機于兩陣之間則璘有不能言者方富平之敗秦  
鳳皆陷金人一意睨蜀東南之勢亦棘微玠身當其衝  
無蜀久矣故西人至今思之作廟于僊人關號思烈

宋按

名臣言行別錄載詔立  
廟仙人關賜額曰忠烈

淳熙中追封涪王子五人拱扶

搗擴揔

按神道碑及功績記林泉野記俱載于三人拱扶搗無擴揔名拱右武扶搗皆文臣

拱

亦握兵云

吳璘字唐卿玠弟也

按王曦撰璘神道碑曾大父諱追封魏國公大父遂追封楚國公考

康追封魯國公

少好騎射從玠攻戰積功至閤門宣贊舍人紹

興元年箭箬關之戰斷摩哩與敖拉扎哈兵使不得合

金人道璘功居多超遷統制軍馬于是玠駐師河池璘

專守和尚原及烏珠大入玠兄弟以死守之敵陣分合

三十餘璘隨機而應至神坐伏發金兵大敗烏珠中流

矢遁張浚承制以璘為涇原路馬步軍副都總管陞康  
州團練使三年遷榮州防禦使知秦州節制階文是歲  
玠敗於祖溪嶺時璘猶在和尚原玠命璘棄原別營僊  
人關以防金人深入四年烏珠薩里罕果以大兵十萬  
至關下璘自武階路入援先以書抵玠謂殺金平地濶  
遠前陣散漫須後陣阻隘然後可以必勝玠從之急修  
第二隘璘冒圍轉戰會于僊人關敵果極力攻第二隘  
諸將有請別擇形勝以守者璘奮曰兵方交而退是不



戰而走也吾度此敵去不久矣諸君第忍之震鼓易幟  
血戰連日金兵大敗自是不敢窺蜀者數年露布獻捷  
遷定國軍承宣使熙河蘭廓路經畧安撫使知熙州六  
年親置行營兩護軍璘為左護軍統制九年陞都統制  
尋除秦鳳路經畧安撫使知秦州玠卒授璘神龍衛四  
廂都指揮使時金人廢劉豫歸河南陝西地樓昭使陝  
以便宜欲命三帥分陝而守以郭浩帥鄜延楊政帥熙  
河璘帥秦鳳欲盡移川口諸軍於陝西璘曰金人反覆

覆難信懼有他變今我移軍陝右蜀口空虛敵若自南山要我陝右軍直擣蜀口我不戰自屈矣當且依山為屯控其要害待其情見力疲漸圖進據紹從之命璘與楊政兩軍屯內地保蜀郭浩一軍屯延安以守陝既而胡世將以四川制置權宣撫司事至河池璘見之曰金大兵屯河中府止隔大慶一橋爾騎兵疾馳不五日至川口吾軍遠在陝西緩急不可追集關隘不葺糧運斷絕此存亡之秋也璘家族固不足恤如國事何時朝廷

恃和忘戰欲廢僊人關於是世將抗奏謂當外固歡和  
內修守禦今日分兵當使陝蜀相接並言諜知薩里罕  
密謀取蜀敵情如是僊人關未宜遽廢魚關倉亦宜積  
糧於是璘僅以牙校三隊赴秦州留大軍守階成山砦  
戒諸將毋得撤備世將尋真除宣撫置司河池十年金  
人敗盟詔璘節制陝西諸路軍馬薩里罕渡河入長安  
趨鳳翔陝右諸軍隔在敵後遠近震恐時楊政在鞏郭  
浩在廊延惟璘隨世將在河池世將急召諸將議惟涇

原帥田晟與楊政同至叅謀官孫渥謂河池不可守欲  
退保僊人關璘厲聲折之曰懦語沮軍可斬也璘請以  
百口保破敵世將壯之指所居帳曰世將誓死於此乃遣  
渥之涇原命田晟以三千人迎敵璘又遣姚仲拒于石  
壁砦敗之詔同節制陝西諸路軍馬璘以書遺金將約  
戰金鵬眼郎君按三朝北盟會編作胡戎郎君以三千騎衝璘軍璘使  
李師顏以驍騎擊走之鵬眼入扶風復攻拔之獲三將  
及百十有七人薩里罕怒甚自戰百通坊列陣二十里

璘遣姚仲力戰破之授鎮西軍節度使陞侍衛步軍都

虞侯十一年與金統軍和珍戰剡家灣敗之復秦州及

陝右諸郡初和珍與希卜蘇合軍五萬屯劉家園

按神道碑

及宋名臣言行別錄三朝北會盟編俱作丁劉園

璘請討之世將問策安出璘

曰有新立疊陣法每戰以長鎗居前坐不得起次最強

弓次強弩跪膝以俟次神臂弓約敵相搏至百步內則

神臂先發七十步強弩併發次陣如之凡陣以拒馬為

限鐵鈎相連俟其傷則更代之遇更代則以鼓為節騎

兩翼以蔽於前陣成而騎退謂之疊陣諸將始猶竊議  
曰吾軍其殲於此乎璘曰此古東伍令也軍法有之諸  
君不識爾得車戰餘意無出於此戰士心定則能持滿  
敵雖銳不能當也及與二將遇遂用之二將老於兵據  
險自固前臨峻嶺後控臘家城謂我必不敢輕犯先一  
日璘會諸將問所以攻姚仲曰戰於山上則勝山下則  
敗璘以為然乃告敵請戰敵笑之璘夜半遣仲及王彥  
銜枚截坡約二將上嶺而後發火二將至嶺寂無人聲

軍已畢列萬炬齊發敵駭愕曰吾事敗矣希卜蘇善謀和珍善戰二人異議璘先以兵挑之和珍果出鏖戰璘以疊陣法更迭戰輕裘駐馬坐麾之士殊死鬪金人大敗降者萬人和珍走保臘家城璘圍而攻之城垂破朝廷以驛書召璘班師世將浩歎而已明年竟割和尚原以與敵撤戍割地皆秦檜之謀也十二年入覲拜檢校少師階成岷鳳四州經畧使賜漢中田五十頃十四年朝議析利州路為東西路以璘為西路安撫使治

興州階成和鳳文龍興七州隸焉時和議方堅而璘治軍經武常如敵至十七年徙奉國軍節度使改行營右

護軍為御前諸軍都統制安撫使如故二十一年以守

邊安靜拜少保

按宗史高宗本紀及神道碑俱作二十一年拜太尉二十九年拜少保宋名臣

言行別錄作十七年加太尉

二十六年領興州駐扎御前諸軍都統制

職事改判興州渡江以來未有使相為都統制者時

璘已為開府儀同三司故改命之三十一年拜四川宣

撫使秋金海陵渡淮遣喀齊喀為西元帥以兵扼大散



關遊騎攻黃牛堡璘卽肩輿上殺金平駐軍青野原並  
調內郡兵分道而進授以方畧制置使王剛中來會璘  
計事璘尋移檄契丹西夏及山東河北聲金人罪以致

討未幾兼陝西河東招討使

按神道碑及宋名臣言行  
別錄俱作三十一年進封

成國公明  
年拜少傅

璘以病還興州總領王之望馳書告執政謂

璘多病猝有緩急蜀勢必危請移璘姪京襄師拱歸蜀  
以助西師凡五書未報璘已力疾復上僊人關三十二  
年璘遣姚仲取鞏王彥屯商號陝華惠逢取熙河或久

攻不下或既得復失竟無成功金人據大散關六十餘日相持不能破仲舍鞏攻德順已踰四旬璘以知夔州李師顏代之遣子挺節制軍馬挺與敵戰於瓦亭敗之璘自將至城下守陴者聞呼相公來觀望咨嗟矢不忍發璘按行諸屯預治黃河戰地斬不用命者先以數百騎當敵敵一鳴鼓銳士空壁躍出突璘軍璘軍得先治地無不一當十至暮璘忽傳呼某將戰不力人益奮搏敵大敗遁入壁會天大風雷金人拔營去凡八日而克璘入

城市不改肆父老擁馬迎拜不絕璘尋還河池四月原  
州受圍璘命姚仲以德順之兵往援璘自趨鳳翔視師  
諸將雖力戰敵攻益急增兵至七萬五月仲與敵戰於  
原州之北嶺仲敗績始璘出師王之望嘗言此行士卒  
銳氣不及前時仲年來數奇不可委以要地及仲至原  
璘亦遺仲書謂原圍未即解且還德順書未達而仲敗  
璘亦無功還尋奪仲兵欲斬之或勸而止械繫河池獄  
孝宗受禪賜璘札命兼陝西河東路宣撫招討使

按神道碑

及宋名臣言行別錄俱

作隆興元年拜少師

璘策金人必再爭德順亟馳赴

先下而完顏錫林等兵果來攻萬戶和和復領精兵自  
鳳翔繼至璘築堡東山以守敵極力爭之殺傷大半終  
不能克時議者以為兵宿於外去川口遠恐敵襲之欲  
棄三路遂詔璘退師敵乘其後璘將士死亡者甚衆三  
路復為敵有拜少傅隆興二年冬金人侵岷州璘提兵  
至祁山金人間之退師遣使來告曰兩國已講和矣會  
詔至俱解去沈介為四川安撫制置使與璘議不協兵

部侍郎胡銓上書語頗及璘璩抗章請朝上親札報可

未半道請罷宣撫使及致仕皆不允乾道元年

按神道碑及宋

名臣言行別錄俱作乾道元年拜太傅進封新安郡王

詣闕遣中使勞問召對便

殿許朝德壽宮高宗見璘歎曰朕與卿老君臣也可數

入見璘頓首謝兩宮存勞之使相踵又命皇子入謁拜

太傅封新安郡王越數日詔仍領宣撫使改判興元府

及還鎮兩宮宴餞甚寵璘入辭德壽宮泣下高宗亦為

之悵然解所佩刀賜之璘至漢中修復褒城古堰溉田

數千頃民甚便之三年卒年六十六贈太師

按神道碑及宋名臣

言行別錄俱作請老之奏聞以太師致仕

追封信王上震悼輟朝兩日賻賜

加等高宗復賜銀千兩初璘病篤呼幕客草遺表命直

書其事曰願陛下毋棄四川毋輕出兵不及家事人稱

其忠璘剛勇喜大節畧苛細讀史曉大義代兄為將守

蜀餘二十年隱然為方面之重威名亞於玠高宗嘗問

勝敵之術璘曰弱者出戰强者繼之高宗曰此孫臏三

駟之法一敗而二勝也賞著兵法二篇大畧謂金人有

四長我有四短當反我之短制彼之長四長曰騎兵曰  
堅忍曰重甲曰弓矢吾集蕃漢所長兼收而並用之以  
分隊制其騎兵以番休迭戰制其堅忍制其重甲則勁  
弓強弩制其弓矢則以遠尅近以強制弱布陣之法則  
以步軍為陣心左右翼以馬軍為左右肋拒馬布兩肋  
之間至怙撥增損之不同則係乎臨機知兵者取焉王  
剛中嘗談劉錡之美璘曰信叔有雅量無英傑天下雷  
同響之恐不能當敵錡果無功以憂憤卒璘選諸將率

以功有薦才者璘曰兵官非嘗試難知其才以小善進之則僥倖者獲志而邊人宿將之心息矣子挺

按神道碑載璘

子十  
二人

挺字仲烈以門功補官從璘為中郎將部西兵詣行在高宗問西邊形勢兵力與戰守之宜挺占對稱旨超授右武郎浙西都監兼御前祗候尋差利路鈐轄改利州東西路前軍同統制紹興三十一年金人渝盟璘以宣撫使總三路兵禦之挺願自力軍前璘以為中軍統制



既復秦州金將喀齊喀貝勒介叛將張中彥以兵來爭  
挺破其治平砦已而南市城賊亦犄角為援轉戰竟日  
挺令前軍統制梅彥慶衆直據城門衆弗喻彥亦懼力  
不敵出兵殊死戰挺率背嵬騎盡易黃旗繞出敵後憑  
高突之敵譁遂驚敗挺不自為功狀彥第一士頗多之  
璘以別嫌併匿其功擢榮州刺史尋拜熙河經畧安撫  
使明年挺被檄與都統制姚仲率東西路兵攻德順金  
左都監空平涼之衆以授喀齊喀又遣精兵數萬自鳳

翔來會仲駐軍六盤挺獨趨瓦亭身冒矢石衆從之金人捨騎操短兵奮鬪挺遣別將盡奪其馬金衆遂潰挺勒兵追之擒千戶耶律糾堅貝勒等百三十七人金人懲前勦悉兵趨德順璘自秦州來督師先壁於險且治夾河戰地金人果大至挺誘致之至所治戰地盛兵蹙之敵不能支一夕遁去鞏州久不下挺以選鋒至城下諸將咸曰西北坡陀地易攻若分兵各當一面宜得利挺曰西北雖卑而土堅東南並河多沙礫善圯且兵分

則少以少當堅城可得而下乎乃命悉衆擊東南陬不下二日樓櫓俱盡夜半其將雷千戶約降黎明城破以功授團練使又以瓦亭功授郢州防禦使孝宗卽位加璘兼陝西河東路招討宣撫使璘慮敵必再爭德順至自河池金人果合兵十餘萬列柵以拒有騎數千睨東山璘命挺領騎迎擊却之遂據東山築堡以守敵不能爭乃益修攻具為大車載土其中將填隍而進挺命掄大木直中道車至不得前拜武昌軍承宣使尋加龍神

衛四廂都指揮使熙河路經畧安撫使中軍統制時年  
二十五會朝廷主議和詔西師解嚴父子遂旋軍乾道  
元年陞本軍都統制三年以父命入奏拜侍衛親步軍  
指揮使節制興州軍馬璘卒起復金州都統金房開達  
安撫使改利州東路總管挺力求終喪服除召為左衛  
上將軍朝廷方議置神武中軍五千人以屬御前命挺  
為都統制挺力陳不當輕變祖宗法事遂寢拜主管侍  
衛步軍司公事挺每燕見從容嘗論兩淮形勢曠漫備

多力分宜擇勝地扼以重兵敵仰攻則不克越西南又不敢我以全力乘其弊蔑不濟者帝頗嘉納淳熙元年改興州都統拜定江軍節度使奏復軍中互市歲市來羌馬七百匹西路騎兵遂雄天下始武興所部就餉諸郡漫不相屬挺秦以十軍為名自北邊至武興列五軍曰踏白摧鋒選鋒策鋒遊奕武興以西至縣為左右後三軍而駐武興者前軍中軍營部於是井井除知興州利州西路安撫使密修皂郊堡增二堡繕戎器儲于兩

庫敵終不覺特加檢校少保成州西和歲大侵挺力為  
賑恤諭總賦者分軍儲以佐之全活殆數千萬西和階  
成鳳文龍六州器械弗繕挺節冗費庀工徒悉勦為之  
郡東北有二谷水挺作二隄以捍之紹興二年水暴發  
入城挺既賑被水者復增築長隄民賴以安詔問備邊  
急務即建增儲之策由是糧糗不乏四年春以疾乞致  
仕詔加大尉卒年五十六贈少師開府儀同三司挺少  
起勲閑弗居其貴將循將士人人有恩隣故部曲拜於

庭下輒降答之至失律誅治無少貸璘嘗對孝宗言諸子中惟挺可任

李顯忠字君錫

按張掄撰李顯忠行狀增

綏德軍青澗人也初名世

輔南歸賜名顯忠由唐以來世襲蘇尾九族巡檢年十七隨父永奇出入行陣金人犯廊延經畧王底命永奇募間者顯忠請行與張琦俱有敵人夜宿陶穴顯忠絕穴中得十七人皆殺之取首二級馬二匹餘馬悉折其足廢大奇之補永信卽克隊將由是知名轉武翼郎克

副將金人陷延安授顯忠父子官永奇曰我宋臣也世襲國恩乃為彼用耶會劉豫令顯忠帥馬軍赴東京永奇密戒之曰汝若得乘機即歸本朝無以我故貳其志顯忠至東京劉麟喜之授南路鈐轄乃密遣其客雷燦以蠟書赴行在已而豫廢烏珠以萬騎馳獵淮上與顯忠獨立馬圍場間顯忠戒吳俊往探淮水可渡馬處欲執烏珠歸朝俊還顯忠馳問之為竹刺傷馬而止烏珠授顯忠承宣使知同州顯忠至廊省侍永奇教顯忠曰



同州入南山乃金人往來驛路汝可於此擒其將渡洛渭由商號歸朝第報我知我當以兵取延安而歸顯忠赴同州即遣黃士成等持書由蜀至吳報歸朝事元帥薩里罕來同州顯忠以計執之馳出城至洛河舟船後期不得渡與追騎屢戰皆勝顯忠憊高原望追騎益多乃與薩里罕折箭為誓不得殺同州人不得害我骨肉皆許之遂推之下山崖追兵爭救得免顯忠携老幼長驅而北至廊城縣急遣人告永奇永奇即挈家出城至

馬超谷口為金人所及家屬二百口皆遇害是日天  
昏大雪延安人聞之皆泣下顯忠僅以二十六人奔夏  
國夏人問故顯忠泣具言父母妻子之亡切齒疾首恨  
不即死願得二十萬人生擒薩里罕取陝西五路歸于  
夏顯忠亦得報不共戴天之讐夏主曰爾能為立功則  
不靳借兵時有羌豪號青面夜叉者久為夏國患乃令  
顯忠圖之請三千騎晝夜疾馳奄至其帳擒之以歸夏  
主大悅即出二十萬騎按行狀作夏主出兵十萬投顯忠乃敗行而西以文臣

王樞武臣伊特鄂為陝西招撫使顯忠為延安招撫使  
時紹興九年二月十四日也顯忠引兵至延安總管趙  
惟清大呼曰酈延路今復歸宋矣已有赦書顯忠與官  
吏觀赦書列拜大哭乃以舊部八百餘騎往見王樞伊  
特鄂諭之曰顯忠已得延安府見講和赦書招撫可以  
本部軍歸國伊特鄂不從曰初經畧乞兵來取陝西今  
既到此乃令我歸耶顯忠知勢不可乃出刀斫伊特鄂  
不及擒王樞縛之夏人以鐵鷄子軍來顯忠以所部拒

之夏兵大潰殺死蹂踐無慮萬人獲馬四萬匹顯忠揭榜招兵每得一人予馬一匹旬日間得萬人皆驍勇少壯又擒害其父母弟姪者皆斬于東城之內行至鄜州已有馬步軍四萬餘薩里罕在耀州聞顯忠來一夕遁去四川宣撫吳玠遣張振來撫諭云兩國見議和好不可生事可量引軍赴行在遂至河池縣見玠玠撫之曰忠義歸朝惟君第一從行使臣崔臯等六百餘人列拜庭下玠又撫之犒以銀絹詣行府受告勅金帶除指揮

使承宣使至行在高宗撫勞再三賜名加賚又錫田鎮江以崔臯輩克將佐烏珠犯河南命顯忠為招撫司前軍都統制與李貴同破靈壁縣烏珠犯合肥手詔以軍與張俊會顯忠于孔城鎮與敵戰敗之烏珠謂韓常曰李世輔歸宋不曾立功此人敢勇宜且避之乃焚廬江而走顯忠欲追之與死戰俊以奉旨監護慮失顯忠遂各以軍還太后至臨安顯忠入覲加保信軍節度使浙東副總管顯忠熟西邊山川險易因上恢復策忤秦檜

意金使言顯忠私遣人過界遂降官奉祠台州居住復  
寧國軍節度使陞都統制三十一年金渝盟詔顯忠以

本部捍禦遣統制官韋永壽等以二百騎至安豐軍與金

將小韓將軍兵五十人戰於大人洲

按宋史高宗本紀  
紹興三十一年冬

十月李顯忠遣統制孔福與金人戰于大人洲又按三  
朝北盟會編載金渝盟係紹興三十一年事本傳作二

十九年  
今據改  
敗之俄又增兵萬餘來顯忠率騎軍出自旦至

午氣百倍以大刀斫敵陣敵不能支殺獲甚衆掩入淮  
者不可計金海陵犯淮西朝廷命王權拒于合肥權退

保和州又棄軍渡江和州失守金軍駐和之鷄龍山將  
濟采石朝廷詔以顯忠代權命虞允文趣顯忠交軍軍  
中大喜於是有采石之捷語在允文傳顯忠退軍沙上  
得楊存中報車駕至平江可速進兵顯忠選銳士萬人  
渡江盡復淮西州郡軍至橫山澗與金射鵰軍戰統制  
頓遇重傷韋永壽死之敵兵敗走金海陵切責諸將不  
用命諸將殺之而還是役也顯忠所將一萬九千八百  
六十人行賞有差張振功為最詔賜顯忠五子金帶授

淮南制置使京畿等處招討使擢太尉寧國軍節度使

主管侍衛馬軍使公事赴行在孝宗即位賜田百頃

按行

狀作賜四

兼權池州駐劄御前諸軍都統制節制軍馬

七十頃

隆興元年兼淮西招撫使時金世宗新立山東河北豪

傑蠡起耶律諸種兵數十萬據數郡之地太行山忠義

耿京王世隆輩皆欲挈地還于朝金懼亟請和顯忠陰

結金統軍蕭琦為內應請出師自宿毫趨汴由汴京以

通關陝關陝既通則廊延一路熟知顯忠威名必皆響



應且欲起其舊部曲可得數萬人以取河東時張浚開  
都督府四月命顯忠渡江督戰乃自濠梁渡淮至陟溝  
琦背約用拐子馬來拒與戰敗之琦復背城列陣顯忠  
躬率將士鏖戰琦敗走遂復靈壁入城宣布德意不殘  
一人中原歸附者踵接時邵宏淵圍虹縣未下顯忠遣  
靈壁降卒開諭禍福金貴戚大周仁及富察圖等皆出  
降宏淵恥功不自己出又有降千戶訴宏淵之卒奪其  
佩刀顯忠立斬之由是二將益不相能六月兵傅宿州

城金人來拒顯忠敗之斬其左翼都統及首虜數千人  
追奔二十餘里宏淵至謂顯忠曰招撫真闕西將軍也  
顯忠閉營休士為攻城計宏淵等不從顯忠引麾下楊  
椿上城開北門不踰時拔其城宏淵等殿後趣之乃始  
渡河登城中巷戰又斬數千人擒八十餘人遂復宿  
州舉寄居官劉時攝州事捷聞授顯忠開府儀同三司  
殿前都指揮使妻周氏封國夫人宏淵欲發倉庫犒士  
卒顯忠不可移軍出城止以見錢犒士士皆不悅金帥

博索自南京率步騎十萬來晨薄城列大陣顯忠親率  
軍遇于城南戰數十合博索大敗遂退走統制李福統  
領李保各以所部退避皆斬以徇翼日敵益兵至顯忠  
約宏淵并力夾擊宏淵按兵不動顯忠獨與所部力戰  
百餘合殺左翼都統及千戶萬戶斬首五千餘人俄增  
兵復來逼城顯忠用克敵弓射卻之宏淵顧衆曰當此  
盛夏搖扇于清涼處猶不堪况烈日中被甲苦戰乎人  
心遂搖無關志至夜中軍統制周宏鳴鼓大譟陽謂敵

兵至與邵世雍劉侁各以所部兵遁繼而統制左士淵  
統領李彥孚亦遁顯忠移軍入城殿司前軍統制張訓  
通馬司統制張師顏池州統制荔澤建康統制張淵各  
遁去金人復來攻城顯忠竭力捍禦斬首二千餘人  
積屍與羊馬牆平城東北角敵兵二千餘人已上百  
餘步顯忠取軍所執斧斫之敵始退卻顯忠曰若使諸  
軍相與角犄自城外掩擊則敵兵可盡金帥可擒河南  
之地指日可復矣宏淵又言金添生兵二十萬來僮我

軍不返恐不測生變顯忠知宏淵無固志勢不可孤立  
歎咤曰天未欲平中原耶何沮撓若此是舉所喪軍資  
器械殆盡幸而金不復南顯忠以軍還見浚納印待罪  
責授果州團練副使潭州安置後朝廷知其故移撫州  
乾道改元乃還會稽復防禦使觀察使浙東副總管賜  
銀三萬兩絹三萬匹綿一萬兩提舉台州崇道觀召除  
威武軍節度使左金吾衛上將軍賜第京師上奇其狀  
貌魁傑命繪像閣下復太尉乞祠提舉興國宮紹興府

居住歲賜米二千石淳熙四年召赴行在提舉萬壽觀

奉朝請賜內庫金再葺前所賜第賜之七月卒年六十

九贈開府儀同三司

按行狀載贈開府儀同三司隴西郡開國公官其後七人並載子十

六人其一未仕師政師道皆戰歿師顏右武大夫高州刺史隴西郡開國子

諡忠襄

楊存中本名沂中字正甫紹興間賜名存中代州崞縣

人祖宗閔永興軍路總管守永興與金人戰死之父震

知麟州建寧砦亦死於難存中魁梧沈鷺少警敏誦書

數百言力能絕人慨然語人曰大丈夫當以武功取富

貴馬用俯首為儒於是學孫吳法善騎射宣和末山東河北羣盜四起存中應募擊賊積功至忠翊郎靖康元年金人再圖汴京諸道兵勤王存中與張俊田師中從信德府守臣梁楊祖以萬兵入援後隸張俊部曲上問將於俊俊以存中對召見賜袍帶時元帥府草創存中晝夜扈衛寢幄不頃刻去側帝知其忠謹親信之劇賊李昱據任城久不克存中以數騎入擊殺數百人帝乘高望見介冑盡赤意其被重創召視之皆污賊血壯之

飲以酒曰酌此血漢存中請復徃帝止之存中曰此賊  
膽碎即成擒矣遂大破之復任城遷閭門祇侯建炎二  
年討賊徐明于嘉興先登主帥將屠城存中力諫止之  
戮其渠魁郡賴以全遷榮州刺史高宗南渡以勝捷軍  
從張俊守吳門苗劉之變又從俊赴難遷貴州團練使  
尋為御前右軍統領金人攻明州又從俊與田師中趙  
宓死戰破之以奇功遷文州防禦使御前中軍統制紹  
興元年從俊討李成諸將議多欲分道進存中曰賊勢



如此兵分則力弱又諸將位均勢敵非招討督之必不相為用俊然之整軍至豫章存中率兵數千首破賊于玉隆觀追至筠州賊驍將以衆十萬來援夾河而營存中謂俊曰彼衆我寡擊之當用奇願以騎見屬公以步兵居前俊從之存中夜銜枚渡筠河出西山馳下擊賊俊以步兵夾攻俘八千人諸將夜見存中曰戰未休降卒多忽有變奈何非盡殲之不可存中曰殺降吾不忍諸將轉告俊竟夜坑之乘勝追至九江成遂遁去遷宣

州觀察使二年春進神武中軍統制存中固辭且謂神武諸帥如韓世忠張俊皆貴擁旄鉞名望至重如臣么麼一旦位與之抗實不自安不許遣中使宣押乃視事兼提舉宿衛親兵時中軍卒不滿五千疲癯者居半存中請拘神武卒借出於外者歸軍中於是軍政寢修三年嚴州妖賊繆羅據白馬源殺王官存中討平之除帶御器械加保信軍承宣使權發遣鄜延路馬步軍副總管六年為龍神衛四廂都指揮使密州觀察使先是張

俊視師謀渡淮以圖劉豫倚韓世忠為用世忠圍淮陽從俊乞張俊將趙密為用俊拒之趙鼎語俊曰存中武勇不減於密宜令助之俊請於朝故有是命於是存中以八隊萬人趨督府助世忠十月存中與劉猷戰于藕塘大破之猷之初入也淮西宣撫使劉光世欲棄廬州退保太平賊衆十萬已次濠壽間俊命張俊拒之使存中往泗州與俊合及至泗則光世已舍廬去俊遣人諭之曰一人渡江即斬以徇光世不得已還廬駐兵與存

中相應賊先犯定遠縣存中以兵二千襲敗于越家坊  
既而與猊兵遇藕塘賊據山列陣矢下如雨存中急擊  
之且使統制吳錫以勁騎五千突其陣陣亂存中鼓大  
軍乘之自以精騎衝其脅大呼曰破賊矣賊錯愕駭視  
前軍統制張宗顏自泗來乘背擊之賊大敗猊以首抵  
謀主李愕曰適見聶將軍銳不可當果楊殿前也即以  
數騎遁去餘黨萬人僵立失措存中躍馬叱之皆怖而  
降麟在順昌孔彥舟方圍光州聞之皆拔砦遁去北方

大恐所得賊舟數百艘車數千兩捷聞帝遣中使勞賜  
除保成軍節度使殿前都虞侯尋兼領馬步帥七年為  
淮南西路制置使九年遷殿前副都指揮使十年金人  
取河南命存中為淮北宣撫副使引兵至宿州以步軍  
退屯于泗金人詭令來告敵騎數百屯柳子鎮存中欲  
即擊之自將五百騎按三朝北盟會編作自將騎兵五千夜襲柳子鎮黎  
明不見敵而還金人以精兵伏歸路存中知之遂橫奔  
而潰參議官曹勛不知存中存亡以聞朝廷震恐於是

有權宜退保之命既而存中自壽春渡淮歸泗人心始安冬引兵還行在十一年烏珠耻順昌之敗復謀來侵詔大合兵于淮西以待之於是存中以殿司兵三萬戍淮與金人戰于柘臯敗之時張俊為宣撫使存中為副使劉錡為判官王德為都統制田師中張子蓋為統制官金人以拐子馬翼進存中曰敵恃弓矢吾有以屈之使萬人操長斧如牆而進諸軍鼓譟奮擊金人大敗退屯紫金山是役也失將士九百人金人死者萬計而濠

圍猶未解俊與存中琦先議班師會有云濠路已通者  
俊謂琦曰吾欲與楊太尉耀兵淮上安撫濠梁之民取  
宣化歸金陵楊太尉則渡瓜州還臨安明日命二帥行  
謀報金攻濠甚急倉皇復回邀琦會于黃連埠距濠六  
十里聞城陷召存中琦謀之琦謂存中何以處此存中  
曰戰爾相公與太尉在後存中當居前琦曰本來救濠  
濠已失進無所依人懷歸心勝氣已索不若退師據險  
俟其去為後圖俊自以為功謂琦毋往命存中與德偕

至濠列陣未定烟起城中金人伏騎萬餘分兩翼出存  
中顧德曰何如德曰德小將何敢預事存中以策麾軍  
曰那回諸軍以為令其走也遂散亂南奔無復紀律金  
人追殺甚衆後一日韓世忠大軍至已無及矣存中乃  
自宣化渡江歸行在加檢校少保開府儀同三司兼領  
殿前都指揮使蓋錄拓臯之功而擒濠梁之敗也十二  
年徽宗梓宮攢永固陵命存中都護竣事拜少傅以保  
傅為管軍自存中始十四年存中請詣太學謁先聖二



十年封恭國公二十八年拜少師恩數視樞密使存中以凡重地皆有統制官獨荆襄無之請于朝于是荆南襄陽初置諸統制存中在殿嚴凡二十五載權寵日盛太常寺主簿李浩敕令所刪定官陸游司封員外郎王十朋殿中侍御史陳俊卿相繼以為言三十一年罷為太傅醴泉觀使進封同安郡王賜玉帶朝朔望時金海陵有南侵意存中上備敵十策步帥趙密謀奪存中權因指為喜功生事存中聞之上章乞免密竟代之未幾

邊聲日急九月詔存中為御營宿衛使劉汜戰敗于瓜  
州命存中往京口為守江計虞允文自采石來會存中  
與之協力拒敵敵不能濟帝如建康詔存中扈蹕金使  
復請和存中請拘之江口移書審問若能歸我族屬還  
舊壤損歲幣復白溝之界以通兄弟之好如是則和議  
可從不然請斬其使亟圖恢復會駕還以存中為江淮  
荆襄路宣撫使給舍不書黃命遂寢未幾仍奉祠隆興  
元年王師潰于符離復起存中為御營使二年金人再

入關議割蜀之和尚原以畀之存中言此隴右之藩要  
敵得之則可以睥睨漢川我得之則可以下兵秦雍曩  
議予金人吳璘力爭不從今璘在遠不及知臣若不言  
非特負陛下亦有媿於璘近者王師盡銳而後得願毋  
棄未幾金人復攻淮甸詔存中同都督江淮事時諸軍  
各守分地不相統一存中集諸將調護之于是始更相  
為援會金人已深入朝議欲舍淮保江存中持不可乃  
已金兵在揚州或勸存中擊之存中不敢渡獨臨江固

壘以老之金人尋請盟乾道元年班師加昭慶軍節度使復奉祠時興屯田存中獻私田在楚州者三萬九千畝二年卒年六十五追封和王諡武恭高宗追念舊臣賻錢十萬存中天性忠孝敢勇大小二百餘戰身被五十餘創宿衛出入四十年最寡過孝宋朝以為舊臣禮異之常呼郡王而不名父祖及母皆死難存中既顯請于朝宗閔諡忠介震諡忠毅賜廟曰顯忠曰報忠又以家廟祭器為請遂許祭五世前所無也祖母劉流落蜀

隴存中日夜禱祠訪問間闕數千里卒迎以歸御軍寬而有紀所用將士專以才勇選不私部曲之舊李顯忠以罪斥存中奏為統制官後為名將嘗以尅敵弓雖勁而蹶張難遂以意創馬皇弩思巧製工發易中遠人服其精子俱佚

郭浩字充道順後軍隴千人以父成任三班奉職徽宗時充環慶路部將嘗率百騎抵靈州城下夏人以千騎追之浩手斬二騎以首還充渭州兵馬都監從种師道

進築葺平砦敵據塞水源以渴我師浩率精騎數百奪之敵攻石尖山浩冒陣而前流矢中左脇怒不援奮力大呼得賊乃已諸軍從之敵遁去由是知名累遷中州刺史欽宗即位進安州團練使以种師道薦召對奏言金人暴露日久思歸乞給輕兵間道馳滑臺時其半度可擊會和戰異議不能用帝問西事浩曰夏人必乘間盜邊願選將設備已而果攻涇原路取西安州懷德軍紹聖開拓之地復盡失之种師中制置河東辟以自隨

建炎元年知原州二年金人取長安涇州守臣夏大節棄城遁郡人亦降浩適夜半至郡所將纔二百人得金人不殺使之還曰為語汝將我郭浩也欲戰即來決戰金人遂引去升本路兵馬鈐轄知涇州權主管廊延路經畧安撫時二敵交侵廊延之東皆金人西北即夏境其屬朝廷者惟保安一軍德靜一軍浩間道之德靜置司招收散亡與敵對壘一年敵不能犯再除涇原路兵馬鈐轄知涇州浩去夏人復來權帥耿友諒僅以身免

一路盡陷張浚為宣撫處置使以浩為秦鳳路提點刑  
獄權經畧使知秦州時浚經畧陝西檄五路帥悉所部  
兵會于富平浩獨謂敵鋒方銳且當分守其地犄角相  
援俟釁而動浚不聽師出果敗五路俱陷浚復以浩舊  
官移知鳳翔府又退保和尚原金人抵原下浩與吳玠  
隨方捍禦蜀以安金第功遷正任防禦使紹興元年金  
人破饒風嶺盜梁洋入鳳州攻和尚原浩與璘往援  
斬獲萬計遷邠州觀察使徙知興元府饑民相聚米倉



山為亂浩討平之徙知利州金人以步騎十餘萬破和尚原進窺川口浩與吳玠大破之遷彰武軍承宣使玠按本路提點刑獄宋萬年陰與敵境通利與浩所鞠不同由是不協朝廷乃徙浩知金州兼永興軍路經畧使金州殘弊特甚戶口無幾浩招輯流亡開營田以其規置頒示諸路他軍以匱急仰給朝廷浩獨積贏錢十萬緡以助戶部朝廷嘉之凡有奏請得以直達九年改金洋房州節制金人還河南地以浩為龍神衛四廂都指

揮使充陝西宣諭使知金州樓炤行關中辟浩樞密院  
都統制節制陝西軍馬十年拜奉國軍節度使五路陷  
徙知夔州移金州仍永興路經畧安撫使節制陝西河  
東兼措置河東路忠義軍馬十一年金人內侵宣撫使  
胡世將召浩及吳璘楊政會仙人原授以攻取之策浩  
遣裨將設伏破之十四年召見拜檢校少保還鎮賜以  
御府金器繡鞍仍官一子文資賜田五十頃別與一子  
閣職是歲分利州為東西兩路以浩為金房開達州經

畧安撫使兼知金州樞密院都統制屯金州仍建帥府  
十五年卒年五十九贈檢校少師諡恭毅淳熙元年賜  
立廟金州

楊政字直夫原州臨涇人父忠與夏戰歿政甫七歲哀  
號如成人其母奇之宣和末應募為弓箭手靖康初因  
拒夏人稍知名建炎間從吳玠擊金人九戰九捷累功  
至武顯郎紹興元年春金人趨和尚原又攻箭箐闕政  
引兵大破之遷右武大夫十月金兵大集號十萬自寶

雞列柵至原下吳玠與相持累日以政統領將兵迎敵  
日數十合士卒無不一當百復出奇兵斷其糧道敵少  
却遮擊之俘獲千人拜恭州刺史時有嫉政者以母妻  
尚留北境不宜屬以兵權玠不聽政益感奮二年金合  
步騎數千柵魚龍川口政帥精兵刼破之升隴州團練  
使移知方山原軍儲芻穀咸在其中三月金大軍來攻  
城且下政擊敗之改知鳳州三年金攻饒風關政從玠  
戰關下凡六日改明州觀察使四年薩里罕率精兵十

萬欲道仙人關入蜀至上奢田玠築壘于關外政曰此地為蜀扼塞當堅守時出奇擊之玠用其言金人變態多端政隨機應之連日百餘戰敵帥督戰益急政命卒以神臂弓射之又選甲士千餘出山谷斷其兵使不得進退又出敵不意夜斫其營敵遂遁去追至河池而還授龍神衛四廂都指揮使環慶路經畧安撫使五年金人攻淮玠命政帥師乘機牽制至秦州一戰而拔撫定居民改經畧安撫涇原兼帥環慶利路三鎮事叢集剖

決無滯母留敵境間遣人省視之母惟勉以忠義九年  
春和議成始得迎母及兄弟歸乞祠以便養不許詔封  
其母感義郡夫人以政為熙河蘭鞏路經畧安撫使知  
熙州進武康軍承宣使十年徙利州又徙興元會金人  
渝盟政建迎敵之策兼川陝宣撫副使司都統制偕統  
制楊從義劫金人于鳳翔府城南若敗之獲戰馬數百  
母卒起服遂帥師趣寶鷄渭水上以拒敵衝凡大戰七  
斬獲甚多川陝宣撫副使胡世將奏鳳翔之捷政奮不

顧身功效顯著拜武當軍節度使十一年秋金將和珍希卜蘓合軍五萬來攻政與吳璘郭浩會于仙人原世將授以攻取之策政引兵夜入隴州界敗金萬戶通檢于寶鷄時通檢居渭北政欲攻拔其城通檢將精甲萬衆出政帥勇士鏖戰遣裨將突出陣後登山執幟金軍見之大呼曰伏發矣乃驚潰政乘勝掩殺擒通檢和議成帝召政還軍民詣部使者借留入見條奏帝善之十三年還鎮加檢校少保久之拜太尉二十七年卒年六

十贈開府儀同三司諡襄毅政守漢中十八年六堰久  
壞失灌溉之利政為修復漢江水決為害政築長堤捍  
之凡利於民者不敢以軍旅廢休兵十餘年未嘗陞遷  
將士上下安之政故為吳璘裨將及與璘分道建帥執  
門下之禮益恭世頗賢之





欽定續通志卷三百七十二

欽定四庫全書

史部

欽定續通志卷三百七十三  
四

編修臣謝振定覆勘

總校官原任侍講臣王燕緒

欽定四庫全書

欽定續通志卷三十三

列傳

宋 此廿七

王德

王彥

張憲

楊再興

胡閔休

牛臯

魏勝

王德字子華通遠軍執羊砦人以武勇應募隸熙帥姚

古會金人入侵古軍懷澤間遣德謀之斬一將而還補  
進武校尉從十六騎徑入隆德府治執偽守姚太師左  
右驚擾手殺數十百人衆愕眙莫敢前古城姚獻于朝  
欽宗問狀姚曰臣就縛時止見一夜又耳時遂呼德為  
王夜义建炎元年以勤王師倍道趨闕改隸劉光世平  
濟南寇李昱池陽寇張遇光世討李成德為先鋒以百  
騎覘賊至上蔡驛口橋賊疑為誘騎擁衆欲西德麾騎  
大呼曰王師大至矣賊駭遁追殺甚衆成奔新息收散

卒復戰賊見光世張蓋行陣不介冑知為主帥併兵圍之德突圍擁光世還軍遂襲敗李成授武畧大夫三年春遷前軍統領屯天長金人攻揚州西軍多潰德趨宣化會叛將張昱張彥圍和州太守張績求援於德德兵傳城下賊不意其至大潰遲明接戰斬昱

按宋名臣言行別錄載張

育聚兵五萬據和州令德聽其節制德不從育親領三千兵來却之德盡伏其兵於深林草中育至不見德乘馬往來於草中尋之德與弟育并王世忠提鎗躍出刺育墜馬斬之復移文城中招育諸將諸將皆降與本傳互俘其兵騎萬數濟自采石光世方謀討苗劉之逆迎

至建康謂德曰江都之擾諸軍不竄則盜公可仗義夜涉大江徇國急變遂以軍屬光世會苗劉走閩中詔德追擊隸韓世忠德欲自致功名而世忠必欲德為之使遣親將陳彥章邀德於信州彥章拔佩刀擊德德殺彥章尸諸市至浦城斬苗瑀擒馬柔吉送行在世忠訟其擅殺下臺獄當死帝命特原之編管郴州時光世屯九江得楊維忠所失空頭黃敕即以便宜復德前軍統制遣平信州妖賊王念經行次饒州會賊劉文舜圍城德

引兵赴之文舜請降德納而誅之倍道趨信州擒僉經  
獻于朝詔還舊秩加武顯大夫榮州刺史四年光世鎮  
京口以德為都統制金兵復南光世將退保丹陽德請  
以死捍江分軍扼險渡江襲金人收真楊數郡既而又  
遇敵于楊州北有被重鎧突陣者直前刺德德揮刀迎  
之即墮馬因麾騎乘之所殺萬計紹興元年平秀州水  
賊邵青初德與戰于崇明沙青軍大潰他日餘黨復索  
戰諜言將用火牛德笑曰是古法也可一不可再先命

合軍持滿陣始交萬矢齊發牛皆返奔賊衆殲焉青自縛請命德獻俘行在召見便殿遷中亮大夫同州觀察使三年命韓世忠代光世德自京口逆世忠徒步立道左抗言曰擅殺陳彥章請死世忠下馬握其手曰知公好漢鄉來纖介不足真懷乃設酒盡歡而別為行營左護軍前軍統制金兵掠江北破滁州德越江襲奪之追至桑根擒萬戶隆布一人千戶十餘人改環慶副總管六年冬劉豫遣麟猊分道入寇德大敗猊兵于藕塘猊



挺身走麟在順昌聞之亦拔砦遁德追至壽春弗及獲  
其糧舟四百艘第功除武康軍承宣使真拜相州觀察  
使七年改熙河蘭廓路副總管行營左護軍都統制駐  
師合肥會光世罷宣撫詔德盡護其衆以鄜瓊副之瓊  
與德故等夷耻屈其下率衆叛從劉豫八年命隸張俊  
名其軍曰脫勝十年解潁昌圍俊檄德就取宿州德倍  
道自壽春馳至蘄縣與敵游騎遇遂入城偃旗仆鼓騎  
引去因潛帥宿州夜半薄金營敵阻汴水邀戰德策馬

先濟步騎從之金將高統軍投兵降守將馬秦耶律溫  
馳入城閉門堅守德至呼秦諭之乃自縊而下德叱其  
子順先登秦率溫降遣詣行在德乘勝趨亳州與俊會  
于城父時叛將鄺瓊屯亳聞德至謂三路都統制曰夜  
叉未易當也遂遁德入亳州白俊曰今兵威已振請乘  
破竹之勢進取東都俊難之乃班師策功第一拜興寧  
軍承宣使龍神衛四廂都指揮使再遷侍衛親軍馬步  
軍都虞候封隴西郡侯十一年金人自合肥入侵游騎

及江俊議分軍守南岸德曰淮者江之蔽也棄淮不守  
是謂唇亡齒寒敵數千里遠來餉道決不繼及其未濟  
急擊之可以奪氣若遲之使稍安則淮非吾有矣俊猶  
豫未許德請益堅曰願父子先越江俟和州下然後宣  
撫北渡俊乃許德卽渡采石俊督軍繼之宿江中德  
曰明旦當會食歷陽已而夜拔和州晨迎俊入敵退保  
昭關又擊走之追至柘臯與金人夾河而軍諸將帥皆  
集惟張俊後至統制田師中欲待之德怒曰事當機會

復何待即與劉錡上馬先迎敵楊沂中繼之烏珠以鐵騎十餘萬夾道而陣德曰賊右陣堅我當先擊之麾軍渡橋首犯其鋒一將被甲躍馬始出德引弓斃之乘勝大呼令萬兵持長斧如牆而進敵大敗退屯紫金山德復尾擊之遂復廬州召拜清遠軍節度使建康府駐劄御前諸軍都統制歷浙東福建總管荆南副都統制二十五年卒贈檢校少保再贈少傅二子琪順亦以驍勇聞

王彥字子才上黨人性豪縱喜讀韜畧詣京師隸弓馬子弟所徽宗臨軒閱試補下班祇應為清河尉從涇原路經畧使种師道兩入夏國有戰功金人攻汴京彥慨然棄家赴闕求自試討賊時張所為河北招撫使異其才擢為都統制使率裨將張翼白安民岳飛等十一將部七千人渡河與金人戰敗之復衛州新鄉縣傳檄諸郡金人以為大軍至率數萬衆薄彥壘圍之數匝彥以衆寡不敵潰圍出諸將散歸彥獨保其城西山遣腹心

結兩河豪傑圖再舉金人購求彥急彥慮變夜寢屢遷其部曲覺之相率刺面作誓示無他意彥益感勵撫愛士卒與同甘苦未幾兩河響應忠義民兵首領傅選孟德劉澤焦文通等皆附之衆十餘萬皆受彥約束金人患之召其首領俾以大兵破彥壘首領曰王都統砦堅如鐵石未易圖金人乃間遣勁騎撓彥糧道彥勒兵待之斬獲甚衆益治兵刻日大舉告期於東京留守宗澤澤召彥會議乃將兵萬餘渡河金人以重兵襲其後而

不敢擊既至汴京澤大喜令彥宿兵近甸以衛根本彥  
即以所部兵馬付留守司量帶親兵趨行在時已遣宇文  
虛中為祈請使議和彥見黃潛善汪伯彥力陳兩河  
忠義延頸以望王師願因人心大舉北伐言辭憤激大  
忤時相意遂降旨免對以彥為武翼郎閤門宣贊舍人  
差充御營平寇統領時范瓊為平寇前將軍彥知瓊有  
逆節稱疾不就乞致仕許之知樞密院事張浚宣撫川  
陝奏彥為前軍統制浚與金羅索相持于富平欲大舉

會諸將議彥曰陝西兵將上下之情未通若少不利則五路俱失不若且屯利閬興洋以固根本敵入境則檄五路兵來援萬一不捷未大失也浚幕府不然其言彥即請為利路鈐轄俄改金均房州安撫使知金州時中原盜賊蠭起加以饑饉無所資食惟蜀富饒巨盜往往窺覲桑仲既陷淮安襄陽乘勢西向均房失守直擣金州白土關衆號三十萬仲彥舊部曲也以申櫝請於彥曰仲於公無敢犯願假道入蜀就食耳彥乃遣統領官



閔立為先鋒擊之立戰死將士或請避之彥叱曰樞相  
張公方有事關陝若仲越金而至梁洋則腹背受敵大  
事去矣敢言避者斬即勒兵趨長沙平阻水據山設伏  
以待賊見官軍少蟻附搏戰彥執幟一麾士殊死鬪賊  
敗走追奔至白磧復房州紹興元年九月權京西南路  
副總管李忠反擾京西遂攻金州諸關賊衆皆河朔人  
驍果善戰彥與戰不利關陷彥退屯秦郊令將士盡伏  
山谷間焚秦郊積聚偽若遁者募敢死士易麾幟設奇

以待閱再宿賊至秦郊官軍逆戰大敗之追襲至秦嶺  
遂復乾祐縣以歸忠走降劉豫初桑仲既敗還襄陽乃  
鳩集散亡陷鄧州凶焰復熾南攻德安西據均陽分衆  
三道一攻注口關一出馬郎嶺一擣洵陽前軍去金州  
不三十里彥曰仲以我寡彼衆故分三道以離吾勢法  
當先破其堅則脆者自走遣副將焦文通禦注口自以  
親兵營馬郎相持一月大戰六日賊大敗仲為其下所  
殺又有王闢董貴祁守中阻兵窺蜀不減數萬彥悉討

平之是冬偽齊秦鳳經畧使郭振以數千騎掠白石鎮  
彥與關師古併兵禦之賊大敗獲振復秦州張浚承制  
以彥節制商虢陝華州軍馬三年正月烏珠入侵浚召  
彥與吳玠劉子羽會于興元薩里罕自上津疾馳不一  
日至洵陽統制官郭進死之彥退保石泉縣金人入金  
州彥趨西鄉復攻饒風關彥與吳玠禦之不能却關破  
彥收餘兵奔達州五月彥遣兵至漢陰與劉豫將周賁  
戰大敗之復金州浚承制進彥保康軍承宣使兼宣撫

司參議彥不受五年四月差知荆南府充歸峽荆門公安軍安撫使彥因荆南曠土措置屯田自蜀買牛千七百頭授官兵耕營田八百五十頃分給將士有差六年二月知襄陽府京西南路安撫使彥以岳飛嫌辭浚奏彥為行營前護副軍都統制督府參謀軍事六月以八字軍萬人赴行在至鎮江聞母喪上疏乞解官不許詔免喪服趣入對遂以為浙西淮東沿海制置副使以所部屯通州之料角七年正月彥因遣將捕亡者於解潛

軍中軍士交鬪於市言者論其軍政不肅貶秩二等彥不自安乞終餘服復洪州觀察使知邵州彥入辭帝撫勞甚厚九年卒于官年五十彥稱名將當建炎初屢破大敵威聲振河朔時方撓於和議遽召之還又奪其兵柄而使之治郡士議惜之

魏勝字彥威淮陽軍宿遷縣人多智勇善騎射應募為弓箭手徙居山陽紹興三十一年金人將南侵勝聚義士三百北渡淮取漣水軍宣布朝廷德意漣水民翕然

以聽遂取海州郡守高文富

按宋名臣言行錄作高文多

聞勝起遣

兵來捕勝迎擊走之追至城下衆驚傳水陸悉有兵城

中大恐文富閉門守驅民上城禦之勝令城外多張旗

幟舉煙火為疑兵又遣人向諸城門諭以金人棄信背

盟無名興師本朝寬大愛民之意城上民間之即開門

勝遣勇銳者登城樓餘自門入莫有禦者獨文富與其

子安仁率牙兵拒守勝整軍與安仁父子戰譙門內殺

安仁擒文富民皆按堵勝權知州事遣人諭胸山懷仁

沭陽東海諸縣皆定乃蠲租稅釋罪囚發倉庫犒戰士  
分忠義士為五軍紀律明肅部分如宿將勝自兼都統  
制益募忠義以圖收復遠近聞之響應旬日得兵數千  
即具其事報境上帥守左軍統制董成謀出西北取沂  
州勝以軍中器甲未備戒成勿動成不從勝不獲已率  
所部千餘人直入沂州巷戰殺其守及軍士三千餘衆  
悉降得器甲數萬後金人復集生兵成軍幾敗金人遣  
蒙古鎮國以兵萬餘取海州抵州北二十里新橋勝設

伏于隘陣以待衆殊死戰伏發賊大敗殺鎮國馘千人  
降三百人軍聲益振山東之民咸欲來附勝傳檄招諭  
結集以待王師之至沂民壁蒼山者數十萬金人圍之  
久不下砦首勝晷告急勝提兵往救之陣于山下金人  
襲之勝單騎而殿以大刀奮擊金人圍之數重勝身被  
數十槍冒刃出圍金兵追之馬中矢踣步而入砦無敢  
當者金人絕其水砦中食乾糲殺牛馬飲血勝禱雨有  
應遂得水金人周山為營勝度其必復攻海州因間出



砦趨城中金人旋解蒼山圍自新橋抵城下勝出戰皆  
捷金分兵四面攻之勝募士登城以禦矢石如雨者七  
日金兵死傷者多遂遁去勝嘗出戰矢中鼻貫齒不能  
食猶親禦戰起義久朝廷尙未知沿海制置使李寶遣  
其子由海道覘敵至州始遣將詣行在白勝之功金海  
陵舉兵渡淮慮勝晚其後分軍數萬來攻會李寶帥舟  
師往膠西破金人舟艦勝遣人邀之同擊金人于新橋  
大敗之金兵退寶復以兵登舟備海道悉獲金舟寶既

捷勝亦還州為捍禦計俄金兵營于城北砂巷列陣將  
攻關門勝開門出諭之責其叛盟失信及兵逼關勝登  
關門張樂飲酒犒軍士令固守勿出戰踰時乃少遣士  
出憑險監擊之金人知不可攻率軍轉而渡河襲關後  
勝斂兵入城金兵追將及勝獨乘馬逐之敵皆辟易士  
卒後入者不復敢追勝軍已入城金兵徑趨城東欲過  
砂堰園城為營勝先據堰備之不得過尋以單騎逐之  
東門外大叱之金兵五百皆望風退勝又追十數里士

得入城金兵復自西南來襲勝從後叱之兵駭散手殺  
數人奏功授閤門祗候差知海州兼山東路忠義軍都  
統遣其子昌同岵嶧山首領張榮持旗榜往結山東忠  
義勝善用大刀能左右射旗掲曰山東魏勝金人望見  
即退走乃為旗十數書其姓名密付諸將遇廩戰即掲  
之初勝起義時無州郡糧餉之給無府庫倉廩之儲經  
畫市易課酒榷鹽勸糴豪右環海州度視敵兵攻取處  
築城浚隍塞關隘在軍未嘗一日懈弛恒如寇至獲金

謀者犒以酒食厚賂遣還有自北方來歸者與之同卧起共飲食示以不疑周其窶貧使之感激自是山東河北歸附者衆得金人虛實悉以上聞又第其忠義士功能假授官資因李寶轉達于朝悉如所請金人復以兵十萬攻海州時寶帥海舟抵城北砂巷勝率衆合寶軍大破之斬首不可計堰水為之不流餘悉奔潰勝獨率兵追北二十里盡獲其鞍馬器甲寶亦駐海州為進取計金人復遣烏錦太師發諸路兵二十餘萬來攻海州

先自州西南斷勝軍餉道勝擇勇悍士三千餘騎拒于石圍堰金軍不能進逮夜始還留千人備險隘金兵十萬來奪勝率衆鏖戰殺數千人餘皆遁去下令守險勿追報寶寶以防海道登舟不復發兵金兵盛集勝力拒之自旦至暮敵不能奪無何金兵環城圍數重勝與統制郭蔚分兵備禦偃旗仆鼓寂若無人金軍疑數日不敢攻已乃植雲梯置砲石四面合圍負土填壕勝俟其近城鳴鼓張旗矢石俱發繼以火牛金液凡三晝夜敵

不能近於是罷攻修營壘絕河道謀為固守勝俟其不  
備掩擊或獨出擾之使不得休息又間夜發兵劫其營  
或焚其攻具既而金人併力急攻勝告急於李寶寶以  
聞命張子蓋率兵來解圍子蓋先帥騎兵至與勝大敗  
金軍斬首不可計追數十里餘兵皆遁勝與子蓋議進  
討子蓋曰受詔解圍不知其他遂率軍還時都督張浚  
在建康招勝詢以軍務轉閭門宣贊舍人差充山東路  
忠義軍都統制兼鎮江府駐劄御前前軍統制仍知海

州隆興元年詔以鎮江御前同統制魏全來守海州督  
府亦遣賈和仲充山東河北路招撫使節制本路軍馬  
海州駐劄和仲忌勝讒勝於都督罷其職改京東路馬  
步軍副總管都督府統制建康府駐劄既而督府知其  
誣復勝舊職改忠州刺史海州城西南枕孤山敵至登  
山瞰城中虛實立見故西南受敵最劇勝築重城圍山  
在內寇至則先據之不能害勝嘗自創如意戰車數百  
兩砲車數十兩車上為獸面木牌大槍數十垂氈幕軟

牌每車用二人推轂可蔽五十人行則載輜重器甲止則為營掛搭如城壘人馬不能近遇敵又可以禦箭簇列陣則如意車在外以旗蔽障弩車當陣門其上寘床子弩矢大如鑿一矢能射數人一發三矢可數百步砲車在陣中施火石砲亦二百步兩陣相近則發弓弩箭砲近陣門則刀斧槍手突出交陣則出騎兵兩嚮掩擊得捷拔陣追襲少却則入陣間稍憇士卒不疲進退俱利伺便出擊慮有拒遏預為解脫計夜習不使人見以



其製上于朝詔諸軍遵其式造焉二年以議和撤海州  
戍命勝知楚州以本州官吏及部兵赴新治詔勝措置  
清河口時和議尙未決金兵乘其懈以舟載器甲糗糧  
自清河出欲侵邊勝覘知之身帥忠義士拒于清河口  
金兵詐稱欲運糧往泗州由清河口入淮勝知其謀欲  
禦之都統制劉寶以方議和不許金騎輒境勝率諸軍  
拒於淮陽自卯至申勝負未決金軍增生兵來勝與之  
力戰又遣人告急於寶寶在楚州相距四十里堅謂方

講和決無戰事迄不發一兵勝矢盡救不至猶依土阜  
為陣謂士卒曰我當死此得脫者歸報天子乃令步卒  
居前騎為殿至淮陰東十八里中矢墜馬死年四十五  
事聞贈保寧軍節度使謚忠莊時淮南未平詔於鎮江  
府江口鎮立廟賜號褒忠且令有司刻木以斂葬於鎮  
江官其二子賜銀絹田宅以劉寶不出救兵削兩鎮節  
鉞貶瓊州死

張憲飛愛將也飛破曹成憲與徐慶王貴招降其黨二

萬有成黨郝政率衆走沅州號白巾賊憲一鼓擒之飛  
遣憲復隨州敵將王嵩不戰而遁進兵鄧州距城三十  
里遇賊兵數萬迎戰與王萬董先各出騎突擊賊衆大  
潰遂復鄧州紹興十年金人渝盟入侵憲戰潁昌戰陳  
州皆大捷復其城烏珠頓兵十二萬于臨潁縣楊再興  
與戰死之憲繼至破其潰兵八千烏珠夜遁憲將徐慶  
李山復捷于臨潁東北破其衆六千獲馬百匹追奔十  
五里中原大震會秦檜主和命飛班師憲亦還未幾檜

與張俊謀殺飛密誘飛部曲以能告飛事者寵以優賞  
卒無人應聞飛嘗欲斬王貴又杖之誘貴告飛貴不肯  
曰為大將寧免以賞罰用人苟以為怨將不勝其怨檜  
俊不能屈俊劫貴以私事貴懼而從時又有王俊者善  
告訐號鵬兒以姦貪屢為憲所裁檜使人諭之王俊從  
檜俊謀以憲貴王俊皆飛將使其徒自相攻發因及飛  
父子庶朝廷不疑俊自為狀付王俊妄言憲謀還飛兵  
令告王貴使貴執憲憲未至俊預為獄以待之屬史王

應求白張俊以為密院無推勘法俊不聽親行鞠煉使  
憲自誣謂得雲書命憲營還兵計憲被掠無全膚竟不  
伏俊手自具獄成告檜械憲至行在下大理寺檜奏召  
飛父子證憲事帝曰刑所以止亂勿妄追證動搖人心  
檜矯詔召飛父子至万俟卨誣飛使于鵬孫革致書憲  
貴令虛申警報以動朝廷雲與憲書規還飛軍其書皆  
無有乃妄稱憲貴已焚之但以衆證具獄語在飛傳憲  
坐死籍家貲紹興三十二年追復龍神衛四廂都指揮

使閬州觀察使贈寧遠軍承宣使錄其家

楊再興賊曹成將也紹興二年岳飛破成入莫邪關再興走躍入澗張憲欲殺之再興曰願執我見岳公遂受縛飛見再興奇其貌釋之曰吾不汝殺汝當以忠義報國再興拜謝飛屯襄陽以圖中原遣再興至西京長水縣之業陽殺孫都統及統制滿在斬五百餘人俘將吏百人餘黨奔潰明日再戰于孫洪澗破其衆二千復長水得糧二萬石以給軍民盡西京險要又得偽齊所留

馬萬匹芻粟數十萬中原響應復至蔡州焚敵糧飛敗  
金人于郾城烏珠合龍虎大王蓋天大王及韓常兵逼  
之飛遣子雲當敵鏖戰數十合敵不支再興以單騎入  
其軍擒烏珠不獲手殺數百人而還烏珠憤甚併力復  
來頓兵十二萬于臨潁再興以三百騎按三朝北盟會編作五百騎  
遇敵于小商橋驟與之戰殺二千餘人及萬戶薩巴貝  
勒千戶百人再興戰死按三朝北盟會編與再興同戰沒者王蘭高林會天大雨溪澗  
皆滿金人不得進官軍乃得還後獲其屍焚之得箭鏃二升

牛臯字伯遠汝州魯山人初為射士聚衆與金人戰屢  
勝補保義郎討劇賊楊進于魯山三戰三捷累遷滎州  
刺史中軍統領金人再攻京西臯十餘戰皆捷加果州  
團練使京城留守上官悟辟為同統制兼西京南路提  
點刑獄金人攻江西者自荆門北歸臯潛軍于寶豐之  
宋村擊敗之轉和州防禦使充五軍都統制又與貝勒  
戰魯山鄧家橋敗之轉西道招撫使偽齊乞師于金入  
寇臯設伏要地自屯丹霞以待敵兵悉衆來伏發俘其



將鄭務兒遷安州觀察使尋除蔡唐州信陽軍鎮撫使  
知蔡州遇敵戰輒勝加親衛大夫會岳飛制置江西湖  
北將由襄漢規中原命臯隸飛軍飛喜甚即辟為唐鄧  
襄郢州安撫使尋改神武後軍中部統領偽齊使李成  
合金人入寇破襄陽六郡敵將王嵩在隨州飛遣臯行  
襄三日糧糧未盡城已拔執嵩斬之得卒五千遂復隨  
州李成在襄陽飛遣臯以騎兵擊破之復襄陽金人攻  
淮西飛遣臯渡江自提兵與臯會時偽齊驅甲騎五千

薄廬州臯遥謂金將曰牛臯在此爾輩胡為見犯衆皆  
愕然不戰而潰飛謂臯曰必追之去而復來無益也臯  
追擊三十餘里金人相踐及殺死者相半斬其副都統  
及千戶五人百戶數十人軍聲大振廬州平進中侍大  
夫從平楊么破之么技窮舉鍾子儀投于水繼乃自仆  
臯投水擒么飛斬其首函送都督行府除武泰軍承宣  
使改行營護聖中軍統制尋充湖北京西宣撫司左軍  
統制加龍神衛四廂都指揮使金人渝盟飛命臯出師

戰汴許間以功最除捧日天武四廂都指揮使成德軍  
承宣使歷荆湖南路馬步軍副總管紹興十七年上已  
日都統制田師中大會諸將臯遇毒明日卒或言秦檜  
使師中毒臯云初檜主和未幾金渝盟入侵帝手札賜  
飛從便措置飛乃命臯及王貴董先楊再興孟邦傑李  
寶等經畧東西京汝鄭潁陳曹光蔡諸郡又遣梁興渡  
河糾合忠義社取河東北州縣未幾李寶捷于曹州捷  
于宛亭捷于渤海廟董先姚政捷于潁昌劉政捷于中

牟張憲復潁昌淮寧府王貴之將楊成復鄭州張應韓  
清復西京臯及傳選捷于京西捷于黃河上孟邦傑復  
永安軍其將楊遇復南城軍又與劉政捷于西京梁興  
會太行忠義及兩河豪傑趙雲李進董榮牛顯張峪等  
破金人于垣曲又捷于心水追至孟州之邵原金張太  
保成太保等以所部降又破金高太尉兵于濟源喬握  
堅等復趙州李興捷于河南府捷于永安軍梁興在河  
北取懷衛二州大破烏珠軍斷山東河北金帛馬綱之

路金人大擾未幾岳飛還朝下獄死世以為恨云

胡閔休字良弼開封人宣和初入太學時方諱兵閔休著兵書二卷靖康初勑知兵科閔休應試中優等補承信郎金人圍城閔休分地而守二帝詣金營閔休欲結義士劫之何鼎禁止之二帝北遷范瓊散勤王師閔休曰勤王師可進不可退檄令隨軍而無靖康年號閔休得之泣下懷檄而走從辛道宗勤王南渡以忠義進兩官湖湘盜起閔休作致寇禦寇二篇言天地之氣先春

後秋招之不伏則討之於是以岳飛為招討使飛辟閔  
休為主管機宜文字以誅鍾子儀功進成忠郎飛被誣  
死閔休發憤杜門佯疾十年卒有勤王忠義集藏于家  
孫照

欽定續通志卷三百七十三